

四庫全書

子部

欽定四庫全書

子部

六藝之一錄卷二十一

詳校官中書臣陸湘

貢外郎_臣牛稔文覆勘

總校官檢討臣何思鈞

校對官中書_臣宋枋達

謄錄監生_臣龔秉敬

篆隸監生_臣郎錦駒

欽定四庫全書

六藝之一錄卷二十一

錢唐倪濤撰

金器款識二十一

梁陶弘景古今刀劍錄

夏禹子帝啟在位十年以八月庚戌鑄一銅劍其長三尺九寸藏之秦望山腹上刻二十八宿文有背面面文為星辰背記山川日月

孔甲在位三十一年以九年歲次甲辰採牛首山鐵鑄

一劍名曰夾古文篆書

殷太甲在位三十一年以四年歲次甲子鑄一劍文曰
定光古文篆書

武丁在位五十九年以元年歲次戊午鑄一劍長三尺
銘曰照膽古文篆書

周昭王瑕在位五十一年以二年歲次壬午鑄五劍各
投五嶽銘曰鎮嶽尚方古文篆書

簡王夷在位十四年以元年歲次癸酉鑄一劍長三尺

銘曰駿大篆書

秦昭王璽在位五十二年以元年歲次丙午鑄一劍長三尺銘曰誠大篆書

秦始皇政在位三十七年以三年歲次丁巳採北祗銅鑄二劍銘曰定秦小篆書李斯刻埋在阿房宮閣下一在觀臺下長三尺六寸

漢高帝邦在位十二年以始皇三十四年於南山鑄一鐵劍長三尺銘曰赤霄大篆書及貴常服之此即斬

蛇劍也

文帝恒在位二十三年以初元十六年歲次庚午鑄三劍長三尺三寸銘曰神龜多刻龜形以應大橫之兆
帝崩命入玄宮

武帝徹在位五十四年以元光五年歲次乙巳鑄八劍長三尺六寸銘曰八服小篆書嵩恒霍華泰山五嶽
皆埋之

宣帝詢在位二十五年以本始四年鑄二劍長三尺一

曰毛一曰貴以足下有毛故為之皆小篆書

平帝衍在位五年以元始元年歲次辛酉掘得一劍上
有帝名因服之大篆書

王莽在偽位十七年以建國五年歲次庚午造威斗及
神劍皆煉五色石為之銘曰神勝萬里伏小篆書長
三尺六寸

更始劉聖公在偽位二年自造一劍銘曰更國小篆書
後漢光武帝秀在位三十三年未貴時在南陽鄂山得一

劍文曰秀霸小篆書帝常服之

順帝保在位十九年以永建元年鑄一劍長三尺四寸

銘曰安漢小篆書後改年號

靈帝宏在位二十二年以建寧三年鑄四劍文曰中興

一劍無故自失並小篆書

魏武帝曹操以建安二十年於幽谷得一劍長三尺六

寸上有金字銘曰孟德王常服之

蜀主劉備以章武元年歲次辛丑採金牛山鐵鑄八劍

各長三尺六寸一備自服一與太子禪一與梁王理一
與魯王永一與諸葛丞相亮一與關侯羽一與張侯飛
一與趙侯雲並是亮書皆作風角處所有令稱元造刀
五萬口皆連環及刃口列七十二鍊柄中通之兼有二
字房子容曰唐人尚書郎李章武本名方古貞元季年
為東平帥李師古判官因理第掘得一劍上有章武字
方古博物亞張茂先亦曰蜀相諸葛孔明所佩劍也乃
改名師古為奏請改為章武焉蓋蜀主八劍之一也

後主禪延熙二年造一大劍長一丈二尺鎮劍口山往
往人見光輝後人求之不獲

吳主孫權以黃武五年採武昌銅鐵作千口劍萬口刀各長
三尺九寸刀頭方皆是南銅越炭作之文曰大吳小篆書
孫亮以建興二年鑄一劍文曰流光小篆書

孫皓以建衡元年鑄一劍文曰皇帝吳王小篆書

晉武帝司馬炎以咸寧元年造八千口刀銘曰司馬
懷帝熾以永嘉元年造一劍長五尺銘曰步光小篆書

成帝行以咸和元年造十三口刀銘曰興國

穆帝聃以永和五年於房山造五口劍銘曰五方單符

隸書

孝武帝昌明以大元元年於華山頂埋一劍銘曰神劍

隸書

宋武帝劉裕以永初元年鑄一刀銘其背曰定國小篆

書長四尺後入於梁

少帝義符以景平元年造一刀銘曰五色小篆書

前廢帝子業以景和二年於蔣山頂造一劍銘曰永昌

篆書

後廢帝昱以元徽元年掘得一刀銘曰上血其光照一
室帝奇之至五年七月帝使楊玉候織女玉候女不
得懼死用以弑帝果如銘故知吉凶其徵先見矣

齊高帝蕭道成以建元二年造一刀銘曰定業長五尺
篆書自制之

明帝鸞以建武二年造一刀銘曰朝儀長四尺小篆書

梁武帝蕭衍以天監二年即位至普通中歲在庚子命弘景造神劍十三口用金銀銅錫鐵五色合為之長短各依劍術法文曰服之者永治四方並小篆書

諸小國刀劍

前趙劉淵以元熙二年造一刀長三尺九寸文曰滅賊
隸書

後趙石勒以建平二年造一刀用五百金工用萬人頭
尖長三尺六寸銘曰建平隸書勒未貴時耕地得一

刀銘曰石氏昌篆書

石季龍以建武十四年造一刀長五尺銘曰皇帝石氏
隸書

後蜀李雄以景平元年造刀五百口文曰騰馬隸書
前涼張寔造刀百口無故刀盡失文曰霸

後魏昭成帝拓拔健以建國元年於赤冶城鑄刺刀十
口金縷赤冶字

道武帝珪以登國元年於嵩阿鑄一劍銘曰鎮山隸書

明元帝嗣以泰常元年造一劍長四尺銘背曰泰常至
真君元年有道士繼天師為帝造劍長三尺六寸隸
書曰真君因改元

宣武帝恪以景明元年於白鹿山造一刀文曰白鹿隸
書

前秦苻堅以甘露四年造一刀用五千工銘曰神術隸
書

前燕慕容儁以元璽元年造二十八口刀銘曰二十八

將隸書

後燕慕容垂以建興元年造二刀長七尺一雄一雌隸書若別處之則鳴

後秦姚萇以建初元年造一刀銘曰中山長三尺七寸隸書

西秦乞伏國仁以建義三年造一刀銘曰建義隸書

後涼呂光以麟嘉元年造一刀銘背曰麟嘉長三尺六

寸

南燕慕容玄明以建平元年作刀四口文曰建平隸書
西涼李暠以永建元年造珠碧刀一口銘曰百勝隸書
北涼沮渠蒙遜以永安三年造刀百口銘曰永安隸書
夏赫連勃勃以龍昇二年造五口刀背刃有龍雀環兼
金縷作一龍形長三尺九寸銘曰古之利器吳楚湛
盧大夏龍雀名冠神都可以懷遠可以柔邇如風靡
草威服九區宋王劉裕破長安得此刀後入於梁

吳將刀

周瑜作南郡太守造一刀背上有盪冠將軍字八分書
蔣欽拜列郡司馬造一刀文曰司馬隸書

周幼平擊曹公勝拜平虜將軍因造一刀銘背曰幼平
潘文拜偏將軍為擒蜀將拜固陵太守因造一刀銘曰固陵
朱理君少受征討黃武中累功拜安國將軍作一佩刀

文曰安國

蜀將刀

關侯為先主所重不惜身命自採都山鐵為二刀銘曰

萬人及侯敗侯惜刀投之水中

張飛初拜新亭侯自命匠鍊赤朱山鐵為一刀銘曰新亭侯蜀大將也後被范彊所殺彊將此刀入於吳

魏將刀

鍾會克蜀於成都土中得一刀文曰太乙會死入帳下王伯昇伯昇後渡江刀遂飛入水

郭維於太原得一刀文曰宜為將後遂為將軍及與蜀將戰敗失此刀

袁紹在黎陽夢有一神授一寶刀及覺果在卧所銘曰
思召紹解之曰思召紹字也

以上俱刀劍錄

太公劍銘

常以服兵而行道德行則福廢則覆

晉裴昇文身劍銘

器以利表實以名舉良劍耿介體文經武陸斷玄犀
水截輕羽九功斯象七德是輔

晉張協太阿劍銘

太阿之劍世濟其美淬以清波欽以越砥如玉斯曜
若影在水不運自肅率土從軌

古劍銘

神鋒燭天氣冲斗青冰出匣蒼龍吼魑魅魍魎爾勿
走乾坤造化在吾手

古劍銘二

昆吾之精太阿之靈嵯嵯三尺離離七星剗犀嶽摧

斷蛟海清烈士壯心誰有不平

唐劍銘

貞觀闕逢季秋重陽吉日造銘曰百鍊精鋼淨掃妖氛

以上俱鐵網珊瑚

茂陵寶劍銘

昭帝時茂陵家人獻寶劍上銘曰直千金壽萬歲

京內

雜記

火字劍

昔漁者于江濱見雷公逐一小黃蛇擊殺之化為劍
背有火字許旌陽斬蛇第三劍蓋至寶也今在張伯

雨處

雲烟過
眼錄

金器款識

印文

漢舊儀曰諸侯王黃金橐駝紐文曰璽列侯黃金龜紐
文曰之印丞相大將軍黃金印龜紐文曰章御史大
夫章匈奴單于黃金印橐駝紐文曰章御史二千石

銀印龜紐文曰章千石六百石四百石皆銅印鼻紐

皆為通官印

太平御覽

六體者古文奇字篆書隸書繆書蟲書皆所以通知古今文字摹印章書信也師古曰繆篆謂其文屈曲

纏繞所以摹印章也

漢書藝文志

王莽篡位莽皇孫功崇公宗坐自畫容貌被服天子衣冠刻印三

一曰維祉冠存已夏處南山藏薄冰

文穎曰祉福祚也冠存已欲襲代也應劭曰夏處南山就陰涼也藏薄冰亦以除暑也

二曰肅聖寶繼

應劭曰莽自謂承聖舜後能肅敬得天寶龜以立宗欲繼其緒

三曰德封昌圖

蘇林曰宗自言以德見封當遂昌熾受天下圖籍

發覺案驗宗自殺

漢書王莽傳

璽書拜馬援伏波將軍注東觀記援上言臣所假伏波將軍印書伏字犬外嚮城臯令印臯字為白下羊丞印四下羊尉印白下人人下羊即一縣長吏印文不同恐天下不正者多符印所以為信也所宜齊同薦

曉古文字者事下大司空正郡國印章奏可

後漢書
馬援傳

王溥即王吉之後也傭書於洛美形貌又多文辭來就其書者丈夫贈其衣冠婦人遺其珠玉一日之中衣寶盈車而歸積粟十廩九族莫不仰其衣食洛陽稱

其為善而得富也溥先時家貧穿井得鐵印銘曰傭
力得富錢至億庾一土三田軍門主簿後以一億庾
錢輸官得中壘校尉三田一土壘字也中壘校尉掌
軍壘門故曰軍門中主簿也積善降福明神之報也

拾遺錄

常山張顥為梁相天新雨後有鳥如山鵲飛翔近地令
人撻之墮地為圓石顥令椎破得一金印文曰忠孝
侯印顥上之藏之秘府後議郎汝南樊衡校書東觀表

上言堯舜之時舊有此官今天降印宜可復置

博物志

荊門軍圖經關將軍廟在當陽縣玉水山紹興初有潭
州人得其印于水者二十有三年寺僧法源白于高
使君得公牒之潭取之歸于寺其文為壽亭侯印四
字方廣一寸有半其上有穿穿有環廣如其印又其
上並二環各廣七分加其半以為之長色皆剛瑩異
常銅環古所以佩也三十有二年艮齋謝先生自夷
陵考試回嘗見之荊門太守王公錄云余幼時侍先

公為湖南提舉常平時得觀之印方二寸餘細字上有雙環闊可六七寸篆不古非漢魏間字體莫可推曉或云晉宋以下別有封壽亭侯者亦未可知予以慶元中因職事嘗於左藏封樁庫見之如其制又有關南司馬一印字皆作疊篆不知何時在左藏則是別有此二印也毗陵人張駒千里好古曩嘗云建炎二年六月復州寶相禪院科修城木于三門前大樹下劖四尺餘得此印環上刻建安二十年壽亭侯印

今環上却無此字又與荆門王所載不同

雲麓漫抄

嘉泰壬戌予道經姑蘇於常賣翁得故紙一幅陳蹠碎

破上有印文方四寸餘朱色未落云六合同之印

按鄴侯傳唐肅宗在靈武徵天下兵所鑄頃常收拓

本漢甄上刻此篆文本朝丞相李昉書其下謂家藏

是印文而失之蓋乾德乙丑歲也

蘇浦筆記

漢有摹印篆其法只是方正篆法與隸相通後人不識

古印妄意盤屈且以為法大可笑也多見故家藏得

漢印字皆方正近乎隸書此即摹印篆也王球嘯堂集古錄所載古印正與相合凡屈曲盤回唐篆始如此今碑刻有顏魯公官誥尚書省印可攷其說

漢魏印章皆用白文大不過寸許朝爵印文皆鑄蓋擇日封拜可緩者也軍中印文多鑿蓋急於行令不可緩者也古無押以印章為官職信令故如此耳自唐用朱文古法漸廢至宋南渡絕無知者故後宋印文皆大謬

白文印皆用漢篆平方正直字不可圓縱有斜筆亦當取巧寫過

三字印右一邊一字左一邊兩字者以兩字處與為一字處相等不可兩字中斷

四字印若前二字交界畧有空後二字無空須當空一畫地別之字有有脚無脚故言及此不然一邊見分一邊不分非法度也

軒齋等印古無此式惟唐相李泌有端居室三字印白

文玉印或可照例終是白文非古法不若只從朱文
朱文印用雜篆體不可大怪擇其近人情免費詞說可
也

白文印用崔子玉寫張平子碑上字及漢器上并碑蓋
印章等字最為第一

凡姓名表字古有法式不可隨俗用雜篆及朱文

白文印必逼於邊不可有空空便不古

朱文印不可逼邊須當以字中空空白得中處為相去庶

免印出與邊相倚無意思耳字宜細四傍有出筆皆帶邊邊須細於字邊若一體印出時四邊虛紙昂起未免邊肥於字也非見多者不能曉此

多有人依款識字式作印此大不可蓋漢時印文不曾如此三代時却又無印學者慎此周禮雖有璽節及職金掌辨其嫩惡揭而璽之之說註曰印其實手執之印音節也正面刻字如秦氏璽而不可印印則字皆反矣古人以之表信不問字反淳朴如此若戰國時

蘇秦六印制度未聞淮南子人間訓曰魯君召子貢授以大將軍印劉安寓言而失詞耳

道號唐人雖有不曾有印故不可以道號作印用也三字屋扁唐却有法

凡印文中有一二字忽有自然空缺不可映帶聽其自空古印多如此

凡印僕有古人印式二冊一為官印一為私印具列所以實為甚詳不若嘯堂集古錄所載只具音釋也

凡名印不可妄寫或姓名相合或加印章等字或兼用印章字曰姓某印章不若只用印字最為正也二名者可迴文寫姓下着印字在右二名在左是也單名者曰姓某之印卻不可迴文寫名印內不可着氏字若曰姓某私印不可印文墨只宜封書亦不可迴文寫名印內不可着氏字表德可加氏字亦當詳審之表字印只用二字此為正式近人欲并加姓氏于其上曰某氏某若作姓某父古雖有此稱係他人美已却

不可入印人多好古不論其原不為俗亂可也漢人三字印非復姓及無印字者皆非名印蓋字印不當用印字以亂名耳漢張長安字幼君有印曰張幼君右一字左二字唐呂溫字化光有印曰呂化光亦三字表德印式幼君西漢王式弟子化光見柳文呂衡州也諸印文下有空處懸之最佳不可妄意伸開或加屈曲務欲填滿若寫得有道理自然不覺空也字多無空不必問此

王球嘯堂集古錄二卷正文共一百紙序跋在外其間
有古文印數十有一曰夏禹像漢巫厭水災法印世
俗傳有渡水佩禹字法此印乃漢篆所以知之又一
印曰孔夫音誤是孫茲二字又有滕公墓銘鬱二作
兩字書且妄為剝落狀然考之古法疊字只作二小
畫附其下秦時大夫猶是以夫字加二小畫況此疊
文者乎偽無疑矣 古印式二冊即漢官威儀無印
本僕自集成者後人若不得見只於嘯堂集古錄十

數枚亦可為法

已上俱
學古篇

李陽冰曰摹印之法有四功侔造化冥受鬼神謂之神
筆畫之外得微妙法謂之奇藝精於一規規圓方謂
之工繁簡相參布置不紊謂之巧趙彥衛曰古印文
作白文蓋用以印泥紫泥封詔是也今之米印倉教
印近之矣自有紙始用朱字間有為白字者通典云
北齊有木印長一尺廣二寸五分背上為鼻紐長九
寸厚一寸廣九分腹下隱起篆文曰督攝萬幾惟以

印藉縫今觀合縫條印蓋原於此秦有八體書三曰刻符即古所謂繆篆五曰摹印蕭子良以刻符摹印合為一體徐鍇謂符者竹而中刻之字形半分理應別為一體摹印曲屈填密則秦篆文也子良誤合之

宣和譜四卷楊克一書譜一卷

又名集古印格

王厚之復

齋印譜顏叔夏古印譜二卷姜夔集古印譜一卷吾

衍古印文二卷趙孟頫印史二卷

輯錄

東臯雜錄云漢碑額多篆身多隸隸多凹篆多凸惟張

平子碑則額與身皆篆也慎按三代鍾鼎文有欵識
隱起而凸曰欵以象陽中陷而凹曰識以象陰刻之
印章則陽文曰朱文陰白曰白文蓋古今金石同一

例也

丹鉛
總錄

楊氏集古印譜叙

浦城楊遵雅性好古畜古印甚富慮夫物之有形必有
終弊也乃捫撫其家與好事所藏摸其文為集古印
譜由尚方小璽王侯將軍都尉太守所佩郡丞長史

令宰丞尉騎督軍曲軍司馬等所綰與夫漢叔孫通
衛青等所懷炳炳燁燁然何其多也稽時世先後書
制度形象考前代官制辨古文籀篆分隸之同異又
何其精且博也嘻方其磨礱以成形歟識以成文佩
之組藏之匣國有官守家有子孫固不期於湮淪散
棄也荒墟敗塚之間草莽所翳沒兵火所垢蝕耕夫
牧子之所弄利又豈期於隆好者以為奇異之玩也
嗟乎物之顯晦有時抑又有幸不幸者耶豈久而必

有相得者亦理之常也邪是以君子之於已自得而已不汲汲於外也或謂今之好古者聚物斯譜有焉予曰不然捷為之磬汾陰之鼎秦璽漢劍曲阜之履歷世傳以為寶寧尚賴其用哉亦云上古而已是譜也上下數千載間攷其制訂其文如見其人其善以勸其惡以戒亡但為玩好具而已也襄陰王沂師魯撰

楊氏集古印譜序

予家舊藏王子弁嘯堂集古錄列古印刻式三十有七
後遊杭識竹房吾子行得學古編其所收益富當時
視為該博乃今見浦城楊侯宗道印譜絕出二書遠
甚展卷披閱使人慨然有懷古之意予觀周官職金
所掌之物皆揭而璽之鄭氏謂璽者印也則三代未
嘗無印特世遠湮沒非若彝器重大而可以久傳者
也然則虞卿之所棄蘇秦之所佩殆亦周之遺制與
漢去古未遠其制作必有自來斯譜之所以不易得

也蓋亦錄梓而行諸世俾好事者得有所攷焉宗道
其勉之京口俞希魯識

題楊氏手摹集古印譜後

右集古印譜四冊其一署曰上之上皆官印印文百有
六其二曰上之下亦官印文如一冊而益其十有四
其三曰下之上皆私印文如二冊而復益其五十有
七其四曰下之下亦私印文視三冊而損其五十有
二下之下尾又有吾氏摹印篆官私具一百五十六

去其重複八十四而取其七十有二復綴以收附私
印百有十六連詩文題跋所識印十五凡七百三十
一舊譜以印印紙光采粲然旁書形鈕之制若玉若
瑪瑙若銅若銀若塗金若塗銀官則曰某代某官私
則曰某姓若名字至為詳悉惟吾氏所摹直以墨拓
于紙而已譜始集于浦城楊遵宗道備載襄陰王公
師魯番陽周公伯溫金華王公子充京口俞公希魯
所撰文後歸吳郡陸友仁則有高郵龔璘先生及

內翰虞文靖公揭文安公為賦衛青玉印詩文可為
左驗今藏西平沐府余為前軍左都督李公手摹一
過公覽而愛之遂裝潢以藏諸篋笥然余觀王球嘯
堂集古錄吳興趙文敏公印史太末吾先生印式錢
唐葉景修漢唐篆刻圖書韻釋皆未若此譜為詳蓋
漢有摹印篆其法平方正直繁則減除少則增續與
隸相通漢晉印章皆除官擇日封拜者必鑄以授之
軍中急於行令故印文多鑿官重者或兩刻成文虛

爵者或正其文填以金銀人名私印多刻非鑄六朝而
降叅用陽文終非古法唐用陽文始屈曲盤迴如
所謂繆篆而古法漸廢至宋終無知者故宋印皆大
謬元官私印亦用陽文作俑殆自文敏如學古編三
十五舉其自十八舉以下皆辨論印篆苟取是譜而
證之槩可見矣都督公知而好之其尚友古人之意
為何如哉若余所書目眊手拙以戊寅歲七月戊戌
肇工八月壬子畢手歷十有七日而僅得其髣髴云

乃書而識之會稽萍居道士唐愚士拜手謹書

吳氏印譜序

印章之來尚矣制式之等鈕綬之別雖各有異所以傳
令示信一也是編自漢至晉凡諸印章搜訪殆盡一
一摹搨類聚品列沿革始末標註其下不惟千百年
之遺文舊典古雅朴厚之意粲然在目而當時設官
分職廢置之由亦從可攷焉吳氏孟思素以篆隸名
而是編皆其手錄尤可寶也能君仲章得之以示余

故書此而歸之至正二十五年五月甲子豫章揭泐
書

顧氏集古印譜叙

顧氏作集古印譜成屬余序其事余曰唯唯余按古者
印璽尊卑通名昔魯襄公在楚季武子使公冶問璽
書是不獨天子稱璽矣唯天子稱璽者乃秦漢故事
天子六璽皆玉螭虎鈕其文亦殊用武都紫泥封之
為信漢舊儀云諸侯王黃金璽橐駝鈕文曰璽然則

又不獨天子稱璽矣乃今顧氏譜有荆王之璽蓋足徵云列侯丞相將軍印則皆用黃金鈕皆龜文列侯者曰印丞相將軍者曰章中二千石印銀鈕亦龜文曰章而千石六百石四百石印銅鈕鼻文曰印禮儀志又云印璽王玉押銀鑲文貴人長主文銅鑲漢武帝太初元年謂漢以土德王土數五故更印章以五字凡不足五字者用之字足之議郎樊衡因張顯上鵠中印其文為忠孝侯印字乃上言堯舜時舊有此

官然堯舜時有此官今雖無可考見當時君臣乃輒
為置官置印由是以觀是三代未嘗無印而印璽尊
卑通名信矣故公署者為官印私家者為私印而世
代沿革制度同異或玉或金或銀或銅或瑪瑙或寶
石或磁或塗金或塗銀或商金或錯銀其鈕或用螭
用虎用豸用獸用橐駝用龜用羊用馬用狻猊用辟
邪用輪用環用連環用瓦用覆斗用鼻唯所欲用矣
而其文篆古樸竒妙皆古人精神心法之所寓者非

譜無以示千百世後矣然古無印譜有印譜自宋宣
和始宣和譜今不傳而後王厚之順伯亦譜之已而
王球子弁氏有嘯堂集古錄趙文敏子昂有印史太
末吾衍子行氏有學古印式編浦城楊遵宗道氏有
集古印譜錢唐葉景脩氏有漢唐篆刻圖書韻釋諸
家唯楊遵氏為最多然亦莖莖止七百三十一方輒
近世詩文印記亦附矣然皆摹本而長洲沈潤卿始
以順伯子昂錢舜舉子行及子行弟子吳孟思所摹

及其所未摹者作刻譜以傳近古杭郎叔寶氏七修類藁中亦刻數十方然統諸家數尚不及千矣而摹刻俱為失真刻石則朱白難辨上海顧氏稱世家三世以博雅傳自御醫公世安氏搜購始及光祿君汝由鴻臚君汝脩大理君汝和光祿子天錫歷祖孫父子兄弟綿遠矣而搜購遠近不遺餘力乃董董得玉印一百六十有奇銅印一千六百有奇然較之諸家所傳則三倍矣顧氏兄弟嘗曰六經尚矣六經之外

唯有彝鼎歟識彝鼎歟識之外唯有秦漢碑版鏤刻
此皆古人心畫神蹟所寄然歲久風日蝕剝者無幾
而金石版鏤皆摹拓重翻未免失真多矣唯茲印章
用墨用硃用善楮印而譜之庶後之人尚得親見古
人典刑神蹟所蹟心畫所傳無殊耳提面命也已又
嘗語余曰余家自御醫府君而下世嗜畜古人名蹟
故商周彝鼎之屬及法書名畫金玉印章之類董董
凡數十種矣一惟倭變遷徙流離再遭時艱獄辭連

染故三世所畜一旦歸於有力而印章並存亦未敢保其不它物聚散有數人無與焉而使之泯滅不傳可惜也故作是譜譜凡二十本噫其意蓋深遠矣譜式首尚方璽即秦始皇九字璽也次荆王之璽之類次官印次私印私印以沈約韻為前後而始朱氏尊國姓也集印者太原王常幼安氏隆慶六年壬申夏五月望日四明沈明臣序

王禕楊氏印譜贊

太樸既散人文肇興厥初字畫用代結繩維鳥蹟科斗
詘屈縱橫遐哉邈矣莫覩其名迨乎篆籀繼作體制情
狀叅造化以成形或勒諸鐘鼎或刻諸印璽或簡策是
載或琬琰是登垂諸後世昭如日星然而璽印之制始
自秦斯繇漢暨魏率世遵代承方寸之廣斷玉鏤金字
奇而畫精龜螭其鈕紫蓋其綬而尊卑等殺因之以明
或用之公府或用之私家封泥署紙信施令行嗟物有
不朽歷繇禩曠齡流傳人間雖土蝕石剝而質猶堅貞

有若上方殿中長樂未央都尉司馬徹侯列卿有若叔
孫通公孫弘周昌韋賢賈山衛青公私所用若此等類
不可悉稱浦城楊君博學多能遐搜旁撫忘寢食以留
情拓其文朱膏墨凝會粹而譜之歲輯月增古歎異識
羣分而類并譬如殘圭斷壁舉手可掬又如貯金而滿
簾一開卷間古人之精神粲然猶生番陽周公題辭以
發揮語意渾成金華王律推演其義續為之贊如組笥
之著銘博雅之士尚於茲有徵

楊氏印譜題辭

印譜題辭

肩瑞輯珎古粉廊款印已
昭化產謹可稽公署私家
省司攸安鑲玉煊金紐所
崑泉摹篆詰厯體方拜奇
纘翬蛟蟠印書發揮世所
面萬堂坐貞希濡朱鑲印

觸類可推并載上迹指掌
于茲累想見幽告款識
泐傳鼎彝幾好古君子
幽多肉上番周伯溫易楊
宗兆止并書

六藝之一錄卷二十一

欽定四庫全書

六藝之一錄卷二十二

錢唐倪濤撰

金器款識二十二

集古印譜

漢小璽

長樂未央 銅印

王印

樂安王章 銅印塗金龜紐

漢和帝改千乘王寵國為樂安王晉初封皇子鑒惠
帝封齊王同子永皆為樂安王前漢表云諸侯王金
璽盤綬漢舊儀云諸侯王金印橐駝鈕文曰璽刻曰
某王之璽晉志云凡王金印龜紐鍊朱綬蓋改用龜
鈕不復言璽矣此印鈕龜而文曰章決非劉寵國所
佩豈晉以假司馬鑒或司馬永耶

公印

京兆郡開國公章 銅印塗金龜紐

兩漢無五等爵曹操自封魏公而開國之號始見於
晉令文帝黃初二年始封王之子為鄉公其後以為
定制宋齊因之梁陳置九等郡有王嗣王藩王開國
郡縣公開國縣侯開國縣伯子男其秩皆一品

侯印

冠軍侯印 銅印塗金龜鈕

前漢武帝以霍去病征匈奴功冠三軍封冠軍侯

正義侯印 銅印塗金龜鈕

平都侯印 銅印塗金龜鈕

平都侯印 銅印龜鈕

漢平都侯國屬豫章郡

綏武侯印 銅印龜鈕

臨淄侯印 銅印龜鈕 漢臨淄屬齊郡

廣平侯印 銅印辟邪鈕

漢光武建武二年封吳漢為廣平侯食采廣平漳曲

周廣年四縣廣平故城在洺州永年縣永年即廣平

避隋煬帝諱因改焉

巨野侯章 銅印塗金龜紐

濟州巨野縣禹貢大野澤在其東北兩漢屬山陽郡

烏程侯印 銅印龜紐 漢烏程屬會稽郡

武平侯印 銅印塗金龜紐

漢武平縣屬陳國獻帝建元中曹操為大將軍武平

侯

昌邑侯印 銅印

陽晉侯印 銅印龜鈕 晉陽屬太原郡

歸趙侯印 銅印龜鈕

晉紀劉元海族子曜以元帝大興元年僭帝位改國號曰趙據有關中又大興二年石勒據襄僭位亦改國號曰趙此必二胡以來封降者

赤泉侯印 銅印

都鄉侯印 銅印塗金龜鈕

漢承秦制侯功大者食縣小者食鄉得臣其吏民皆

為列侯後漢始有大縣侯小縣侯鄉亭侯之等差
如建武中封趙王相二子為鄉侯建初中封栩十子
為亭侯之類又鄉亭各有名號如誅梁冀行封尹勲
為宜陽都鄉侯郭渭為鄴都亭侯魏黃初三年初制
封王之庶子為鄉公嗣王庶子為鄉侯公之庶子為
亭伯厥後定制凡王公侯伯子男六等次縣侯次鄉
侯次亭侯次關內侯又置名號侯爵十八級關中侯
爵十七級皆金印紫綬又通典品秩魏諸國王侯伯

子男皆一品諸縣侯三品諸鄉侯四品亭侯五品關
內侯六品及考漢制常山有為鄉侯國安帝建光元
年貶平原王翼為都鄉侯

都鄉侯印 銅印辟邪鈕

武陽亭侯 銅印塗金龜鈕

秦制十里一亭十亭一鄉漢因之大率縣方百里

宜都亭侯 銅印

門亭侯

陽平亭侯

長貴亭侯 銅印塗金龜紐

平都亭侯 銅印鼻紐

南亭侯印

柱亭侯印 銅印塗金龜紐

都亭侯印 銅印塗金龜紐

後漢皇后紀獻帝母王夫人兄斌興平元年封都亭侯注云凡言都亭者並城內亭也漢法大縣侯位視

三公小縣侯位視上卿鄉縣亭侯視中二千石也

漢都亭侯印 銅印盤螭紐

安昌亭侯 銅印塗金龜紐

制度字畫極佳趙子昂學士於都下得之按漢志襲錄徹侯之號或取其縣蕭何鄼侯是也或取其鄉公孫弘平津侯是也或取其亭關雲長壽亭侯是也

關内侯印

二

一玉印鼻鈕

見欣賞編

一玉印龜紐

秦爵廿等二十徹侯十九關内侯居京師而無國邑

後漢志云無土寄食所在縣民租多少各有戶數為限漢靈帝中平四年賣關內侯假金印紫綬按關內侯不應有玉印即有恐出偽造或王厚之誤銅為玉也

關內侯印

九十

銅印

塗金龜鈕者十六

龜鈕者三

關中侯印

四

銅印

龜鈕者二

塗金龜鈕者二

建安廿年曹孟德始制名號侯至五大夫與舊制列侯關內侯凡六等以賞軍功而關中侯爵十七級金

印紫綬不食租虛封耳

關外侯印 銅印龜鈕

黃初定制關外侯爵十六級銅印龜鈕墨綬

高安縣開國侯章 銅印龜鈕

楊宗道印譜云文之上有金鈿五字云輔國將軍章
蓋古之虛爵也高安屬筠州輔國將軍後漢置晉宋
皆有之

故成平侯私印 銅印辟邪鈕

廣城侯

順陽侯家印信 銅印橐駝鈕

漢成帝建始二年正月封膠東王子童為順陽侯章
帝建初四年封衛尉馬廖為順陽侯

將軍印

大將軍印章

後漢書百官志云將軍不常置本注曰掌征伐背叛
比公者四第一大將軍次驃騎將軍印次車騎將軍

次衛將軍又有前後左右將軍初武帝以衛青數征伐有功以為大將軍欲尊寵之以古尊官唯有三公皆將軍始自秦晉以為卿號故置大司馬官號以冠之其後霍光王鳳等皆然成帝綏和元年賜大司馬印綬罷將軍官世祖中興吳漢以大將軍為大司馬景丹為驃騎將軍位在公下及前後左右雜號將軍衆多皆主征伐事訖皆罷

左大將軍章 銅印鼻鈕

偏將軍印

二

銅印

一鼻鈕

一索鈕

按姜白石印譜云老子有曰偏將軍處左則其來尚
矣王莽地皇元年下書曰予之皇初祖考定天下將
兵為上將軍內設大將外置司馬五人大將軍廿五
人偏將軍百廿五人裨將軍千二百五十人又有校
尉司馬候當士吏士累至千三百五十萬人於是賜
諸州牧號為大將軍郡卒正連帥大尹為偏將軍蓋
莽天鳳元年置卒正連帥大尹職如太守凡新室太

守皆號偏將軍也更始以光武為太常偏將軍光武
為偏將軍無印得定睦侯家丞印佩之入朝吳漢家
貧販馬為業聞世祖長者獨欲歸心及世祖於廣阿
拜偏將軍後漢初自寇恂馮異等以偏將軍見於史
者數十人其後凡魏晉南北皆有之後魏北齊品甚
卑止列於從九品按漢舊儀比二千石以上

中部偏將軍章

左衛將軍 銅印龜紐

漢舊儀云典京師兵衛四夷屯警

折衛將軍章

鷹揚將軍章

二

銅印

一龜鈕

一商金龜鈕

振武將軍章

銅印龜鈕

凌江將軍章

銅印商銀龜鈕

廣武將軍章

銅印塗金龜鈕

將軍章

銅印龜鈕

武將軍印

冠軍將軍

龍驤將軍章

二

銅印塗金龜紐其一文亦鈿金此虛

爵也

平西將軍

銅印龜紐

晉周處為平西將軍沈約宋書臨川王義慶為平西
將軍後齊四平將軍正三品梁以四平四翊為廿班
陳四平品第三秩中二千石藏義興周孝侯廟廟祝
世掌之

建武將軍章 銅印龜紐

漢韓安國王晏並為之蜀志劉封傳文帝善孟達姿
才遂授此官

超武將軍之印 銅印獸紐

梁大通二年再序將軍號為二十四班有安夷超武
綏邊等號

伏波將軍 銅印龜紐

按伏波將軍前漢路博德後漢馬援陳登夏侯惇魏

滿寵甄像孫禮盧欽晉孫秀葛洪陶延皆為此官魏
晉宋五品後魏北齊從五品梁四班後周五命其名
其人不一而邵公濟記此印據犬文內嚮直以為馬
新息所假印恐未必然使犬文外嚮尚可立說為路
或為馬侯先所假者內向者乃其常援既正之後自
不應復誤據內向便為馬侯未為至論又謂伏波云
者止博德與援考之不審矣印文大而巧鈕不合制
疑六朝後物也

河南邵博論曰客有行雲陽嵯峨山中得古印寸餘
塗金駝印鈕其文曰伏波將軍印蓋漢印字用五土
數也然漢有兩伏波前邳離路博德也後將軍新息
馬援也予攷其篆畫知其為馬援印焉按世祖建武
十七年交趾女子徵側反攻沒其郡九真日南合浦
蠻夷皆應之寇略嶺外六十餘城側自立為王詔拜
馬援伏波將軍討之而東觀記載援當時所上書曰
臣所假伏波將軍印書伏字犬文外向恐天下不正

者多符印所以為信也所宜齊同薦晚古文字者事
下大司空正郡國印章奏可以路博德在援之前未
經是正其印犬文外向無疑此印犬文内向是後改
正者為援印也明矣以漢百官志攷之將軍不常置
皆主征伐事訖則已曰大將軍驃騎前後左右將軍
其名其人不一而以伏波者止博德與援也蓋皆水
戰援既南征將樓船二千艘戰士二萬餘斬五千級
降以萬計斬其魁傳首京師方其殺牛醢酒勞餐軍

士官屬慷慨相與語其意氣盛矣當時萬里之外一
軍之中視此方寸印為何如者豈亦料此後千餘歲
委於荆管瓦礫之地為牛童馬卒之所得好事者百
金可贖也又況不以功業取富貴欲其區區傲天下
而垂後世斯惑矣

揚烈將軍章

綏邊將軍章

銅印龜鈕

安夷將軍章

銅印龜鈕

虎伏將軍之印

征虜將軍章 銅印塗金龜紐

古者寄軍政於六卿故周禮大司馬萬有二千五百人為軍軍將皆命卿左傳晉獻公作三軍公將上軍禮記稱衛彌牟為將軍文子史記齊公以穰苴為將軍此將軍之名其來尚矣後漢建武中祭遵為征虜將軍廉潔奉公光武嘆曰安得憂國奉公如祭征虜者乎漢末孫賁張飛亦為之魏志太祖以臨菑侯植

行征虜將軍桓範劉勲亦授此官雍丘縣有魏征虜將軍王思賢碑吳孫皎虞察皆為之沈約宋書征虜世號金紫將軍

奮武將軍章 銅印龜鈕

按史記年表漢元帝永光二年七月太常任千秋為奮武將軍擊西羌吳志豫章東郡民彭村李玉作亂衆萬餘賀齊討平誅其首惡餘皆降采其精健者為兵次為縣戶遷奮武將軍

寧朔將軍章 銅印龜鈕

換烈將軍之印 二

討虜將軍

建安五年曹操表孫權為討虜將軍領會稽太守

安東將軍章

裨將軍張騫 銅印鼻鈕

將印

殿中中郎將印

中郎將秦官漢因之掌三署凡郎官主更直執戟宿衛諸殿門

武衛次飛武賁將印

後漢曹公為丞相有武衛營魏文帝置武衛將軍以主禁旅

牙門將印章 銅印塗金龜紐

魏黃初置冠服與將軍同王隱晉書云陸機少襲父爵為牙門將

牙門將之章

銅印塗金龜紐

牙門將印章

三

銅印

龜紐者一

塗金龜紐者一

鼻鈕一

部曲將印

十六

俱銅印鼻鈕

部下有曲曰部曲者總言之也其餘將軍亦有部曲以領兵晉武帝太始元年罷部曲將納質任

督印

騎督之印

五

銅印

塗金龜紐者四

鼻鈕者一

魏晉第五品有騎督高貴鄉公紀騎督敬琰魏志騎
督偏將軍路蕃楊宗道印譜云晉彭祈碑陰題名其
官屬有騎督步督散督之號

千人督印 銅印鼻鈕

部曲督印 三 俱銅印鼻鈕

東漢志大將軍有長史司馬皆一人職參謀議掾屬
二十九人其領軍皆有部曲孫皓天紀三年夏郭馬
反馬本合浦太守修允部曲督晉紀李庠傳趙欽將

有異志委庠以心膂表為部曲督晉世祖武帝咸寧五年除部曲督以下質任

騎部曲督

三

銅印鼻鈕

晉書朱伺自騎部督加綏夷都尉後以功封亭侯領騎督

副部曲督

銅印鼻鈕

司馬督印

按通志國簿略司馬督在前中道左右各司馬史三

人引仗左右各六行

軍印

護軍印章 銅印鼻鈕

按護軍都尉秦官漢元狩四年屬大司馬哀帝更名
司寇平帝更名護軍晉永昌元年省護軍并領軍大
寧元年復置領護各領營兵

行營左護軍印 銅印鼻鈕

行營右護軍印 銅印螭鈕

行營右護軍

澹如護軍章

討穢辦軍印 銅印龜紐

尉印

都尉 銅印龜紐

東漢百官表郡尉秦官掌佐守典武職甲卒秩比二千石
景帝二年更名都尉

殿中都尉

五

銅印 龜紐者四 塗金龜紐者一

魏晉有此官晉武帝遺詔差殿中都尉司馬十人給
楊駿令得持兵仗出入

駙馬都尉

六

銅印

塗金龜鈕三

細商金龜鈕一

龜鈕二

漢東京罷三公外戚宗室諸侯多奉朝請武帝亦以
宗室外戚為奉車駙馬騎三都尉而奉朝請馬元帝
為晉王以參軍為奉車都尉掾屬為駙馬都尉行參
軍舍人為騎都尉皆奉朝請後罷奉車騎二都尉留

駙馬都尉奉朝請諸尚公主者劉惔桓溫皆為之

奉車都尉

二

銅印

塗金龜鈕一

錯銀龜鈕一

前漢百官志奉車都尉掌御乘輿車駙馬都尉掌駙馬皆武帝初置秩比二千石後漢百官志奉車都尉比二千石掌御乘輿駙馬都尉掌駙馬騎都尉監羽林騎右屬光祿勳皆二千石漢宣帝地節二年以霍山為奉車都尉領尚書事

騎都尉

三

銅印龜鈕

武猛都尉

二

銅印瓦鈕

漢何進使武猛都尉丁原燒孟津火照城中又魏橫海將軍碑載呂君歷武猛都尉考其時乃建安中也

參軍都尉

銅印龜鈕

廣漢屬國都尉

銅印穿鈕

廣漢屬益州後漢志云故北郡都尉屬蜀郡安帝時以為屬國別領三城

巧工都尉

銅印龜鈕

校尉之印章

二

銅印龜鈕

東漢百官志大將軍營五部部校尉一人比二千石

司隸校尉

銅印龜鈕

漢武帝初置司隸校尉後漢亦置之所部河南尹河
內左扶風右馮翊京兆尹河東弘農凡七郡治河南
洛陽無所不糾唯不察三公廷議九卿上朝賀處公
卿上凡司隸所屬有從事史十二人其都從事史置為
雄劇主察百官之犯法者魏晉司隸與兩漢同司隸

於端門外坐在諸卿上絕席其入殿按本品秩在諸卿下不絕席隋煬帝置司隸臺有大夫一人掌諸巡察薛道衡為司隸大夫別駕二人分察

武猛校尉 銅印龜鈕

建安中吳潘璋為武猛校尉魏齊王芳嘗祀武猛校尉典韋於太祖庭韋以建安二年死事也魏有武猛中郎將校都尉豈其屬耶

建威偏將校尉 漢威武將校尉 綏民校尉 銅印

鼻鈕

今道州有漢故綏民校尉騎都尉桂陽曲紅灌陽長
熊君碑篆額與此印無異

析尉之印章 銅印龜鈕

故鄣尉印 銅印鼻鈕

西漢表云縣皆有丞尉秩四百石至二百石是為長
吏故鄣秦鄣郡所治東漢屬丹陽郡吳興記曰中平
年分縣南置安吉縣光和末張角亂此鄉守險助國

漢嘉之故立縣

吳尉之印 銅印鼻鈕

周太伯自號勾吳武王求其後因封吳國秦置會稽郡項梁初起吳中使籍斬會稽守殷通即此地也西漢因之後漢分吳等十三城置吳郡陳置吳州隋改蘇州

禹左尉印 銅印鼻鈕

通志略云尉漢諸縣皆有之長安有四尉分為左右

部後漢令長國相亦皆有尉大縣二人小縣一人主追捕盜賊按察姦宄署諸曹掾史鬲屬平原郡夏時有鬲君滅浞立少康

海陵左尉 銅印鼻鈕

臨津左尉 銅印鼻鈕 臨津屬韓州

姑臧右尉 銅印鼻鈕 東漢姑臧屬北地郡南山谷

水所出

雲陽右尉 銅印鼻鈕 雲陽屬左馮翊魏屬北地隋

屬京兆

原陽右尉

銅印鼻鈕

杜陵右尉

銅印鼻鈕

王翁主尉

銅印鼻鈕

按史記齊厲王母曰紀太后太后取其弟女為厲王后王不愛紀氏女太后令其長女紀翁主入王宮正其後宮母令諸姬得近王欲王愛后也如淳云諸王女曰翁主稱母姓故謂之紀翁主而此印為王女家臣明矣

司馬印

殿中司馬

六

銅印鼻鈕

魏晉始有殿中司馬蓋環衛之官大駕出則居華蓋後乘輿前楯弩間與殿中都尉校尉共一行

殿中太醫司馬 銅印鼻鈕

強弩司馬 銅印鼻鈕

晉文王初起晉臺置中衛及衛將軍而二衛始置前驅由基強弩為三部司馬燕置強弩將軍後周亦有

強弩司馬

虎步司馬

銅印鼻鈕

虎步司馬又有加挫鋒二字言所部虎步之兵勇猛可挫其軍鋒也鋒字當從丰今從中漢逢童子碑逢字亦然

虎步挫鋒司馬

銅印瓦鈕

虎步叟捷司馬

銅印鼻鈕

虎步都尉司馬

銅印穿鈕上刻建武元年正月給

按史漢光武晉惠帝元帝趙石虎燕慕容忠齊明帝
魏北海王顥皆改元建武光武即位六月晉惠改
元在七月晉元在三月慕容忠在六月齊明帝在十
月北海王顥在五月當是石虎時印也

陷陣司馬 銅印瓦鈕

敕古陣字漢安帝元初中任尚募陷陣士擊羌零建
安間樂進于禁皆嘗為陷陣都尉

武力司馬

無當司馬

中衛司馬

銅印鼻鈕

敕賜司馬

建安司馬

闕

龍驤司馬之印

方俗司馬

闕

方俗破虜司馬

漆園司馬

銅印鼻鈕

木工司馬

常山漆園司馬

銅印鼻鈕

軍候司馬

銅印鼻鈕

軍候司馬亦軍司馬之貳

巧工司馬

銅印鼻鈕

按趙德夫金石錄云偽趙建武元年西門豹殿基記

有巧工司馬臣張由等監近歲臨淄縣人耕地得巧
工司馬印遍攷史傳皆無此官僅見此碑所載耳

軍司馬印九 銅印鼻鈕

軍司馬尚矣周禮下大夫四人晉悼公以魏絳張老
為中軍司馬後漢志大將軍五部部校尉一人比二
千石軍司馬一人比千石其不置校尉者但軍司馬
一人前漢楊敞給事大將軍幕府為軍司馬後漢吳
汎鄭衆班勇徐幹董卓夏侯尚皆嘗為之魏晉宋後

周亦有此官

前將軍軍司馬

銅印鼻鈕

左將軍軍司馬

銅印鼻鈕

蜀先主建安中為左將軍以龐義為左將軍軍司馬

軍假司馬

九

銅印鼻鈕

漢志軍假司馬為軍司馬副貳蕭望之遣御史按韓

延壽在東郡時試騎士軍假司馬千人持幢旁數數

事

假司馬印

八

銅印鼻鈕

前漢班超以假司馬使西域

詔假司馬

二

銅印鼻鈕

左將軍假司馬

關

後將軍假司馬

別部司馬

十一

銅印

鼻鈕者九

瓦鈕者二

東漢志軍司馬比千石其別營領屬為別部司馬度

尚傳抗徐為宗資別部司馬擊太山賊又張超從朱

雋征黃巾為別部司馬

左將別部司馬 銅印瓦鈕

右將別部司馬 銅印鼻鈕

後將別部司馬 銅印瓦鈕

軍曲

軍曲 銅印臺鈕

大將軍五部部下有曲曲有軍候一人軍曲候秩六百石假候又為軍候之貳門有門候

候印

軍曲候印

十

俱銅印鼻鈕

軍曲候之印

銅印龜鈕

楊宗道印譜云漢武帝太初元年更印章以五字張晏云漢據土德土數五故用五為印文若丞相則曰丞相之印章諸卿及守相不足五字者亦以之字足之

軍假候印

四

銅印鼻鈕

強弩假候

銅印鼻鈕

北軍中候

二

銅印穿鈕

漢書百官志北軍中候一人秩六百石掌監五營員

吏七人候自得辟

濟南候印

關

聚降尉右前候

大夫印

繡衣執法大夫印

銅印龜鈕

文七作三行大夫作而蓋嶧山碑之篆法漢武時侍御史又有繡衣直討出討姦猾理大獄而不常置後

漢有御史中丞指法二人以佐大夫

太守印

隴東太守章 銅印龜鈕

吳孟思云郡守秦官秦滅諸侯以其地為郡置守丞尉各一人郡守秩二千石治民丞佐之尉典兵漢景帝中元二年更郡守為太守西魏隴東郡後改為隴州

上黨太守章 銅印索鈕

東漢郡國志上黨郡秦置雒陽北千五百里長子銅鞮十三城

義興太守章 銅印龜鈕

晉志惠帝永興元年以周玘創義討石冰割吳興之陽羨并長城縣之北鄉置義鄉國山臨津并陽羨又分丹陽之永世置永平及永世凡六縣立義興郡以表玘之功屬揚州

宜陽太守章 銅印龜鈕

宜陽縣兩漢及晉皆屬弘農郡後魏置宜陽郡開皇
初郡廢屬河南郡

義城太守章 銅印龜紐

隋志襄陽郡穀城縣舊義城郡後周廢

史印

右將軍會稽內史印 銅印斗紐中空刻印兩面合漢
丁為之者中央文朽處乃丁柄窵食小點

晉永和八年王羲之自護軍右將軍代王述為會稽

內史唐太宗貞觀四年虞世南書孔子廟碑成刻石
以拓本進呈太宗加愛賜以此印是印歸虞

司徒左長史印 銅印鼻鈕

東漢百官志司徒公一人世祖即位為大司徒建武
二十七年去大字長史一人千石晉志加置左右長
史各一人秩千石而魏志孫詠為司徒左長史則魏
已加左右非始于晉也

西平郡長史印 銅印鼻鈕

前漢表郡有丞邊郡又有長史秩皆六百石古今注
建武十四年罷邊郡太守丞長史領丞職

龍驤將軍長史 銅印羊紐

宣惠長史之印

司馬史印 銅印鼻紐

東漢志大將軍下長史司馬皆一人本注曰司馬主
兵如太尉又曰令史及御屬三十一人太抵掌治其
事者為令副貳為丞主書記者為史凡司馬皆千石

而史不言其秩又晉鹵簿次司馬督在前中道左右各司馬史三人

令印

太子率更令印

率更令秦官顏師古曰常知漏刻故曰率更漢因之有丞主簿庶子舍人更直職似光祿勳而屬詹事後漢因之為太子少傅屬官魏因之晉主宮殿門戶及賞罰事銅印墨綬

典祠令印 銅印鼻鈕

通志職官畧東晉元帝太興元年始置九分食一王國有傳友典書令丞文學郎中令中尉大農左右常侍內史將軍典祠典衛學官令治書中尉世子庶子陵廟牧長謁者中大夫舍人典府等鍾嶸詩品有宋典祠令任曇緒

中年令印 銅印鼻鈕

漢制列侯所食邑曰國皇太后公主所食曰邑有蠻

夷曰道凡縣萬戶以上為令減萬戶為長侯國為相
秩次亦如之皆秦制也漢因之中牟在鄭州滎陽

江都令印

銅印鼻鈕

東漢屬廣陵郡

故道令印

銅印鼻鈕

屬武都郡出曹參世家

獫令之印

銅印鼻鈕

獫音胎屬右扶風一名武功

封丘令印

銅印瓦鈕

東漢屬陳留郡

穀城令印

銅印鼻鈕

東漢穀城屬東郡

新城令印

銅印鼻鈕

東漢屬河南尹

尋陽令印

銅印鼻鈕

漢屬廣江郡

居巢令印

銅印鼻鈕

東漢志有居巢侯國屬廬江郡

尚畀令印

銅印鼻鈕

尚闕令印

闕

新豐令印

銅印鼻鈕

屬雒陽

永新令印

銅印鼻鈕

阜陵令印

銅印鼻鈕

西漢屬零陵郡

金城令印

銅印鼻鈕

漢晉皆屬金城郡

樊令之印

銅印鼻鈕

前漢屬東平國後漢晉屬任

城國

下相令印

銅印鼻鈕

秦屬泗水郡漢屬淮陽東漢

屬下邳

高安令印

銅印鼻鈕

晉安帝義熙初分沮陽縣置

安寧令印

銅印鼻鈕

按漢志安寧侯國屬豫章郡

安豐令印

銅印鼻鈕

前漢屬六安國後漢屬廬江

郡

丞印

受降太尉丞印

關

關

太守丞印

關

漢志郡志太守一人二千石丞一人秩六百石

弋陽郡丞之印

銅印龜紐

魏分汝南江夏郡置弋陽郡

立義丞印

銅印瓦紐

前漢表凡校尉都尉皆有丞漢建安中龐德為立義

將軍吳孫和以屈幹為立義都尉

平尹丞印

闕

軍司馬丞印 銅印鼻

鈕

橫海侯丞 銅印鼻鈕

軍曲侯丞印 銅印龜

鈕

樂浪前尉丞 銅印鼻鈕

木禾丞印

闕

容城丞印 銅印瓦鈕

漢縣有丞尉及諸曹掾後漢縣諸曹畧如郡員

寧陽丞印 銅印鼻鈕

殺柵丞印 銅印鼻鈕 漢左馮翊有殺柵縣景帝二

年置

農前丞印

闕

農府丞印 銅印壇鈕

多睦子家丞 銅印鼻鈕

漢列侯有家丞而王莽置五等爵有公侯伯子男莽
盡封王氏五服皆以睦為號姚媯田陳之封亦然其
封小功之屬為子多睦子必莽小功之屬也然莽所

改縣如建睦加睦弘睦季睦以睦為名者十有三未
聞多睦蓋以縣封者皆期親侯國若子男之封地鄉
亭故志所不錄也而莽雖於始建國四年授諸侯茅
土以圖簿未足授國邑且令受奉都內故初睦侯姚
恂始睦侯姚昌雖侯亦不見他志子男未有分地無
足疑也

梁旁家丞 銅印鼻鈕

東漢百官志列侯舊有行人洗馬門大夫凡五官中

興以來食邑千戶以上置家丞庶子各一人不滿千戶不置家丞又悉省行人洗馬門大夫

長印

永昌長印 銅印鼻鈕 晉零陵郡有永昌縣

前漢表縣城萬戶為長秩五百石至三百石

宣威長印 銅印鼻鈕 趙寧長印 銅印鼻鈕

武德長印 銅印鼻鈕 東漢屬河內郡

睢陵長印 銅印鼻鈕 東漢屬下邳國

州陵長印

銅印鼻鈕

屬南郡王莽改為江夏東漢

復為州陵

堵陽長印

銅印鼻鈕

東漢屬南陽郡

封德長印

銅印鼻鈕

廣化長印

闕

廣陽長印

闕

綏逋長印

闕

封溪長印

銅印瓦鈕

文極古拙字皆隸法

防東長印

銅印鼻鈕

東漢山陽郡有防東縣

新昌長印

銅印鼻鈕

西漢屬遼東郡

新豐長印二

銅印鼻鈕

屬京兆漢高祖七年置

按西京雜記云太上皇徙長安居深宮悽慘不樂高帝乃作新豐移諸舊人實之太上皇乃悅高帝常祭枌榆之社衢巷棟宇物色惟舊士女老幼相攜路首各知其室放犬羊雞鴨於通塗亦竟識其家匠人胡寬所營也

沮長之印

銅印鼻鈕

漢臨沮屬南郡後周置沮州

故鄣長印二

銅印鼻鈕

秦鄣郡故城故漢以名縣

關寧長印

銅印鼻鈕

浦陽長印

關

玄平長印

銅印鼻鈕

萬安長印

關

津梧長印

銅印鼻鈕

晉屬九真郡

昌邑長印

銅印鼻鈕

漢屬山陽郡

餘杭長印

銅印鼻鈕

屬吳郡

沛祠祀長

銅印鼻鈕

西漢志王國有祠祀長本注曰祠祀比四百石又章

玄成傳高祖時令諸侯王都皆立太上皇廟至惠帝

尊高帝為太祖廟景帝尊孝文為太宗廟行所嘗幸
郡國各立太祖太宗廟合百六十七所則沛固宜有
此官也又按景帝中元六年更太祝名為祠祀高帝
紀班固贊曰高祖即位置祠祀官則祠祀實高祖所
置也

稻農左長

闕

彭城醫長 銅印鼻鈕

府印

中藏府印

闕

東漢百官志中藏府令一人六百石本注曰掌中幣
帛金銀諸貨物丞一人

事印

司隸從事 銅印鼻鈕

後漢志司隸從事史十二人秩百石

立義從事 關

立義行事 銅印鼻鈕

孟思印譜云後漢有立義將軍西域志車師後王穀

燉煌行事注行事謂行長史事漢桂陽太守周憬碑
陰有故行事來陽華夏蜀志馬騰為軍行事領部衆
又南朝以郡太守行州事者皆稱行事

相印

秉德侯相 銅印瓦鈕

列侯所食縣為侯國每國置相一人其秩各如本縣
注曰主治民如令長不臣也但納租于後以戶數為
限

廣望侯相

闕

永闕山國相印

闕

長社侯相

銅印鼻印

東漢有長社侯國屬潁川郡

宰印

就都亭宰印

銅印鼻鈕

王莽傳始建國元年改縣令長曰宰漢志蜀郡廣都縣莽曰就都亭又莽傳縣以亭名者三百六十以應符命文也

佐印

郡五官佐 銅印塗金銳鈕

漢制五官掾秩百石州郡有掾皆自辟除之蘭亭詩
有郡五官佐謝懌

士印

偏將軍中士 銅印龜鈕

使者印

萬安使者章

關

父老印

漢三老信印 銅印龜鈕

漢高帝紀二年詔舉民年五十以上修行能率衆為善者置以為鄉三老鄉各一人擇鄉三老一人以為縣三老與縣丞尉以事相教勿復徭戍

里中父兄私印 銅印鼻鈕

倉印

倉印 銅印 銅甚薄分其長而三文隆其中一段比

印倍厚為鈕色如碧玉鈕左一淺駁不透右

按漢制太倉令丞主管受郡國轉漕穀

蠻夷王印

部洛王章 銅印龜鈕

西漢百官志四夷國王率衆王歸義侯邑君邑長皆

有丞比郡縣

晉歸義夷王 二 銅印塗金索佗鈕

晉歸義羌王 銅印塗金兔鈕

蠻夷君印

晉蠻夷率善邑君

漢青衣道夷長令田內屬安帝增令田爵號為奉通
邑君魏東夷傳有率善邑君今日晉蠻夷者南蠻通
曰蠻夷也

蠻夷侯印

蠻夷邑侯

關

蠻夷長印

漢率衆長

關

漢歸義胡師長 銅印兔鈕

東漢書稽胡散居離石以西安定以東

晉率善胡秋長

闕

姜堯章云歷代印文皆不稱代惟率善今則曰魏率

善某官晉率善某官

蠻夷邑長印

漢叟邑長 銅印獸鈕

尚書牧誓注有蜀叟孔穎達曰叟蜀夷之別名漢興

平元年馬騰劉範謀誅李傕益州牧劉焉遣叟兵五千助之

漢夷邑長 銅印駝鈕

漢青羌邑長 銅印駝鈕

羌乃三苗姜姓之裔又西戎牧人散處三河之間

魏率善羌邑長

闕

晉率善羌邑長 銅印

駝鈕

晉率善氏邑長 銅印駝鈕

氏西南夷種散處廣漢之西

晉率善胡邑長 銅印駝鈕

晉鮮卑率善邑長 銅印駝鈕

晉烏桓率善邑長 銅印駝鈕

晉高句驪率善邑長 銅邑駝鈕

東漢鮮卑都鮮卑山在柳城郡界

東漢高驪屬玄菟郡遼山遼水所出

蠻夷阡長印

漢阡長印 銅印駝鈕

漢匈奴各自置阡長陌長什長者千人之長也

漢叟什長

魏率善叟什長 銅印駝鈕

魏率善胡什長 銅印駝鈕

晉率善胡什長 銅印駝鈕

晉屠各率善什長 銅印駝鈕

晉蠻夷率善什長 銅印虺鈕

漢書槃弧之後號蠻夷今日蠻夷者南蠻之通稱也
其地多蛇虺故為虺鈕

蠻夷佰長印

漢歸義胡佰長 銅印環鈕

魏率善羌佰長 銅印鼻鈕

魏率善氐佰長 銅印駝鈕

魏率善胡佰長 銅印駝鈕


魏烏丸率善佰長 銅印駝鈕

魏屠各率善佰長 銅印駝鈕

晉率善羌佰長 銅印駝鈕

晉率善氐佰長 銅印駝鈕

晉匈奴率善佰長 銅印駝鈕



六藝之一錄卷二十二